

tis pro se quisque fremere, *Deploratam esse rem Venetam, deploratamque libertatem tanta indole a majoribus quaesitam, nisi tribunitio furori finis quandoque imponeretur: discessisse olim majores suos dulcedine libertatis ex amœnissimo solo, relicta patria, domo, laribus, atque cunctis quæ solent hominibus esse charissima, venisseque in desertas insulas, in quibus nihil conspiceretur, quod ad sui cultum invitare posset: licuisse tamen illis, si libertatis oblivisci potuissent, incolumes urbes in quibus nati & educati essent, retinere, atque hac una amissa superbissimo barbaro ociose servire: verum quia viri fortissimi fuerunt, illam ipsam nisi cum morte relinquendam non putarunt. Quid quod multi etiam eorum qui adessent, majorum vestigia secuti, superioribus annis in ea loca venissent, ut liberi viverent? Quid igitur illorum consilia? quid subitæ migrationes profuissent? quid ædificia, templa, ædes publicæ privatæque? quid illud, quod ex continenti servitutis metu decessissent, si insolentia paucorum mediis aquis essent servituri? An crederet quisquam, barbarum hostem ante quieturum, quam si per occasionem liceret, vicinum illud libertatis everteret domicilium, qua nihil magis esse soleat tyranno odiosum? Id sane eum optare: id esse ei cordi, ut quòd alia via efficere non possit, civili discordia rem Venetam solveret. Irent igitur, & qui reipublicæ consultum vellent, novum Ducem continuo crearent, penes quem decus omne imperii ac majestas esset: cui jus concilium cogendi, quotiens de reipublica aliquid referri oporteret: qui tribunos annuos in singulas insulas legeret, a quibus ad Ducem esse provocatio. Cæterum si quis dignitatem, ecclesiam, sacerdotumve cleri populique suffragio esset adeptus, ita demum id ratum haberetur, si Dux ipse auctor factus esset. His decretis, communi omnium consensu Paulutius Heraclianus, vir inclytæ inter suos populares justitiæ, Dux declaratus est, anno, ut quidam tradunt, ab Urbe condita octogesimo secundo ac ducentesimo: ut alii, supra ducentesimum septimo ac nonagesimo: ut item alii, septuagesimo sexto. Illud certè convenit, ducentos triginta & amplius annos remp. tribunitia potestate administratam. Sed in primo Duce creando haud hæc suffragandi ratio inita est, quam hodie in Principum electione fervari videmus,*

Paulutius
Anafestus
primus Dux
creatur
Heraclianus
Dux